



ВЫЛЬ СІЗЁН



ОТДЕЛ  
РЕЛИГИОЗНОГО  
ОБРАЗОВАНИЯ

## ИАКОВ АПОСТОЛЛЭН ЫСТЭМ ГОЖТЭТЭЗ

### 1-тй ЛЮКЕТ

<sup>1</sup>Инмарлэн но Кузё-Инмарлэн Иисус Христослэн льяльчизы Иаков, пазыгиськыса палэнын улийсь дас кык выжыослы, – ваньдылы салам верасько.

<sup>2</sup>Агай-выньёсы, пөртэм визь сынаськонъёс улэ сюриды ке, туж шумпотэлэ. <sup>3</sup>Тодэлэ, тйлесьтыд Инмарлы оскондэс эскерыку, чидан вордйське шуыса. <sup>4</sup>Тй быдэсак дун-шектэмесь, номырлы но ёрмисьтэмесь мед луоды шуыса, тйляд чиданды быдэс улонды ёже юн мед луоз. <sup>5</sup>Тй пöлысь кинлэн ке визьлыкез уг ке тырмы, Инмарлэсь мед куроц. Инмар жалятэк, пыкылытэк ваньмызлы сётэ, – курисьлы сётэмын луоз. <sup>6</sup>Оскыса, чик шекланьтэк\* мед куроц, малы ке шуоно, шекланыса улийсь мурт тöлын жуткам но пазяськыса улийсь заресь тулкымлы укша: <sup>7</sup>сыёе адями медаз малпа Кузё-Инмарлэсь ма ке но басьтыны. <sup>8</sup>Отчы-татчы пазяськись малпанэн улийсь адями аслаз сюрес вылаз юн уг сылы.

<sup>9</sup>Куанер улийсь агай-вын мед ушьяськоз аслаз вылийын луэменыз, <sup>10</sup>нош узыр мурт – аслаз улийын луэменыз, малы ке шуоно, турын пöлысь сяська кадь улонэд ортчоз-тöлзоз: <sup>11</sup>шунды жужа, пöсь луэ но турынэз ёушка, солэн сяськаез усьылэ,

---

\* 1:6 Сомневаться карытэк, оскыса.

солэн чебер тусыз быре. Озыы ик аслаз улон сюрес вылаз узыр мурт но шуя-быре.

<sup>12</sup>Визь сынаськонэз чидам мурт шудо, малы ке шуоно, со эскеремын-чакламын луоз но соин со улонлэсь венецсэ басьтоз, кудзэ Кузё-Инмар Сое яратйсьёслы кузьманы кыл сётйз. <sup>13</sup>Визь сынаськон лыктыку нокин но медаз шуы: ”Инмар визьме сына”. Нокрыче но урод ужлэн Инмарлэсь визьзэ сынамез уг луы, Инмар Ачиз но нокинлэсь визьзэ уг сына. <sup>14</sup>Котькин но аслаз кырсь малпанъёсызлы сётйськыса, мылкыдзэ отчы понэ ке, соин со ассэ визь сынаськон улэ сётэ. <sup>15</sup>Соку кырсь малпан кылдэ но сьӧлыкез вордйськытэ, нош сьӧлык – кулонэз вордйськытэ.

<sup>16</sup>Гажано агай-выньёсы, ӧрекчаськонлы эн сётйськелэ. <sup>17</sup>Котькудйз ик зеч, дун-шектэм кузьым выльйысь ваське, югыт сётйсь Атаймы дорысь, Кудйзлэн воштйськонэз, воштйськонлэн вужерез но ӧвӧл. <sup>18</sup>Мылкыд кариз но – зэмлыклэн кылыныз Со асьмеды вордйськытйз, Солэн кылдытэмъёсыз пӧлын асьмеос нырысетй емышъёсыз мед луомы шуыса.

<sup>19</sup>Озыен, тодэ, гажано агай-выньёсы: котькудйз адями кылзйськись мед луоз, кыл вераны – дыртйсьтэм, вожпоттйсьтэм, <sup>20</sup>уго адямилэн вожпотонэз Инмарлэн шонерлыкезъя улыны люкетэ. <sup>21</sup>Соин ик, котькыче кырсь ужлэсь, уродлыклэсь куштйське. Асьтэдыз востэм карыса Инмар кылэз кабыл басьтэ, кудйз тй пушкы мерттэмын, – со тйлесьтыд лулдэс утыны быгатэ.

<sup>22</sup>Инмар кылэз быдэсьяса улэ, кылзйськыса гинэ эн улэ – асьтэдыз асьтэос эн өрекчалэ. <sup>23</sup>Уго кин кылэз кылзэ но уг быдэсья, со аслэсьтыз ымныр тусбуйзэ синучкон пыр чаклась адямины укша: <sup>24</sup>со ас шораз учкиз, палэнскиз но, со куспын ик вунэтйз, кыче со. <sup>25</sup>Нош кин чик шектэм, эрик сётйсь Инмар закон шоры учкоз но со бордын сюрмыныз улоз, – кылзйськыса, вунэтытэк, уж вылын быдэсьяса, – шудо луоз ужрадьяньёссэ быдэсьякуз.

<sup>26</sup>Тй пöлысь кин ке но ачиз сярись мон осконэн шонер улйсь шуыса малпа ке, нош кылзэ уг ке куты, со ассэ ачиз өрекча. Солэн осконэн шонер улонэз пайдатэм луэ. <sup>27</sup>Инмар азын, Атай азын ярамон дун-чылкыт осконэн шонер улон луэ со: анайтэк-атайтэк кылем нылшиослы, палкышноослы ёрмыса-зудыса улон дыръязы юрттйськон но та дуннелэн уродэныз-лекеныз саптаськытэк астэ ачид утыса возён.

## 2-тй ЛЮКЕТ

<sup>1</sup>Агай-выньёсы! Кузё-Инмармылы Иисус Христослы, пиштйсь данлыклен Кузё-Инмарезлы осконды чылкыт мед луоз, – вылтус шоры эн учкелэ.

<sup>2</sup>Шуом, тйляд люкаськонады пыриз ке зарни зундэсэн, узыр дйськутэн адями, нош соин ёош ик пыриз ке пöсьтэм дйськутэн куанер мурт, <sup>3</sup>соку тй, узыр дйськутэн мурт шоры учкыса, солы шуиды ке: ”Тыныд татчы пуксьыны зечгес луоз”,

нош куанерлы шуиды ке: "Тон отчы султы", яке: "Пуксы татчы, мынам пыд выжыям", – <sup>4</sup>озы асытэ пушкын люкиськон уд лэсытэ-а? Урод малпанэн улйсь судьяослы уд пөрмиське-а?

<sup>5</sup>Гажано агай-выньёсы, кылзйськелэ: Инмар өз бырйы-а та дуннеысь куанерёсты осконэн узыр карыны но Эксэйлыкын локет басытыны вылысь, кудзэ Со Инмарез яратйсьёслы сёто шуиз? <sup>6</sup>Нош тй куанерёсты ултйяды. Тйледыз жикатыса возисьёс узырьёс өвёл-а, тйледыз судэ нуисьёс но соос ик өвёл-а? <sup>7</sup>Дано нимез, кудйныз тй нимаськиськоды, соос өвёл-а саптасьёс? <sup>8</sup>Эксэй законэз тй быдэсьяськоды ке Гожтэмья: "Матысьтэ астэ ачид кадь ик яраты", – умой лэсытйськоды; <sup>9</sup>нош вылтус шоры учкыса сьолыкаськоды ке, закон азын законэз сёрисьёсын одйг радэ пыриськоды. <sup>10</sup>Кин быдэс законэз уте, нош одйг локетсэ сөре ке, соку со ваньмыз понна янгыш луэ. <sup>11</sup>Уго Кин шуиз: "Азон-калгон сьолыке эн пыр", Со ик вераз но: "Эн виы". Соин ик, тон азон-калгон сьолыке өд ке но пыры, нош виид ке, соку тон Инмар законэз сөрись луиськод. <sup>12</sup>Озы вералэ, озы лэсытэ, кызы лэсыто адямиос, кудьёссэ судить кароз эрик сётйсь закон. <sup>13</sup>Гажанэз-жалянэз тодытэк улонзэ ортчытйсьлы гажасьтэм-жалясьтэм суд луоз. Гажан-жалян судлэсь выльынгес луэ.

<sup>14</sup>Агай-выньёсы, мар пайдаез солы, кин шуэ "осконэ вань", нош зеч ужьёсыз өвёл ке? Быгатоз-а таёе оскон сое утыны? <sup>15</sup>Вынмы яке сузэрмы гольык, туннэ нуналлы кёттыронзы но өвёл ке, <sup>16</sup>нош кин ке но тй пöлысь соослы шуиз ке: "Каньыллыкен мынэ, шунтйське, сиське", нош му-



горзылы мар кулэ вал өз ке сёты, – кыче пайдаез луоз? <sup>17</sup>Озы ик оскон но: зеч ужъёсыз өвөл ке, – со кулэмын.

<sup>18</sup>Нош кин ке но шуиз ке: ”Тынад осконэд вань, нош мынам – ужъёсы, – соос пöлысь мон аслэсьтым осконме тыныд возматом, нош тон возматы мыным ужен герзаськымтэ оскондэ”. <sup>19</sup>Тон оскиськод Инмар одйг шуыса, – умой лэсьтйськод; периос но Инмар вань шуыса оско, куалекъяло. <sup>20</sup>Эй, тупыттэм-нодтэм адями, тодэмед потэ-а ужъёстэк оскон кулэмын луэ шуыса? <sup>21</sup>Аслэсьтыз пизэ Исаакез курбон сётон жöк вылэ выдтыса, асьмелэн вашкала пересь атаймы Авраам ужъёсын шонере өз поты-а? <sup>22</sup>Адзиськод-а, оскон солэн ужъёсызлы юрттйз, нош ужъёс пыр оскон ярамон, вылйлыко луиз? <sup>23</sup>Озы, Гожтэмысь кыл быдэсмиз: ”Авраам Инмар кыллы оскиз но та солы шонерлык шуыса гожтйськиз, Инмарлэн эшез шуыса со нимаськиз”. <sup>24</sup>Адзиськоды-а, адями ужъёсыныз шонере потэ, осконэн-гинэ уг. <sup>25</sup>Озы ик Раав но – калгись кышномурт, ужъёсыныз шонере өз поты-а, кукке со ивортыса ветлйсьёсты гуртаз ватйз но мукет сюрес кузя соосты лэзиз? <sup>26</sup>Уго, кызы мугор лултэк улыны уг быгаты, озы ик оскон но ужъёстэк улыны уг быгаты.

### 3-тй ЛЮКЕТ

<sup>1</sup>Агай-выньёсы! Ваньды дышетйсь эн кариське. Тодэлэ: асьмеос, дышетйсьёс, эшшо но золгес судить каремын луомы. <sup>2</sup>Уго ваньмы асьмеос трос

сьӧлыкаськомы. Кин кылыныз уг сьӧлыка, со дуншектэм, быдэс мугорзэ но кортнаны со быгатэ. <sup>3</sup>Тани, асьмеос валлэн ымаз асьмелэсь мед кылзйськоз шуыса кортнэт понйськомы ке, соку солэн быдэс мугорыныз кивалтйськомы. <sup>4</sup>Тани, корабльёс но, макем соос бадзымесь, макем кужмо тӧльёс пӧлтй ветло, нош пичи гинэ руль пыр валтйсько-нуисько отчы, кытчы корабль нуисьлэн нуэмез потэ. <sup>5</sup>Озыы ик кыл но, – мугорлэн пичи гинэ люкетэз, нош трос ужъёс лэсьтэ. Учкы, пичи гинэ тыл, нош макем бадзым нюлэсэз сутэ: <sup>6</sup>кыл – со тыл, шонертэм улонлэн чеберлыкез. Мугор люкетъёсмь пушкы интыяськыса, со быдэс мугормес сапта. Ачиз геенна тылын жуаса, улон азьмес чюшка. <sup>7</sup>Уго котькуд пӧйшурез но тылобурдоез, нюж кыстйськыса ветлйсьёсты но зарезын улйсь макеосты адями зйбломьтыны быгатэ. Зйбломьтйз но ини. <sup>8</sup>Нош кылэз зйбломьтыны нокин но уг быгаты: со – кутыса возыны луонтэм урод маке. Со пачылмемын кулон ваись ядэн. <sup>9</sup>Кылынымы Инмарез, Атаез данъяськомы, соин ик Инмарлы укшатыса кылдытэм адямиос вылэ юриськиськомы. <sup>10</sup>Одйг ымысь ик потэ ушьянданъян но, юриськон но. Агай-выньёсы, тазы талуыны кулэ өвӧл. <sup>11</sup>Одйг ошмес синмысь ик бызе-а ческытэз но, кузьытэз но ву? <sup>12</sup>Агай-выньёсы, смоквапуд маслина мулы сётыны уг быгаты, нош виноградпуд – смоква мулы. Озыы ик, одйг ошмес огдыре кузьыт но, ческыт но ву сётыны уг быгаты.

<sup>13</sup>Кудды тй пöлысь визьмоезгес, валасезгес? Возьматы сое уж вылын: астэ зечен возыса, визьмын зйбыт улыса. <sup>14</sup>Нош тйляд сюлмады лек вожьяськонэз, ачимьяськонэз вань ке, соку эн ушьяське, зэмлыклы пумит эн мынэ. <sup>15</sup>Со – выльйись васькись визьлык öвöл, со – музьем выльсь, луллэсь, периослэсь потйсь визьлык. <sup>16</sup>Уго кытын вожьяськон но ачимьяськон, отын луэ тупатэк улон, вань урод ужъёс. <sup>17</sup>Нош выльйись васькись визьлык, нырысь ик, со – дун-чылкыт, собере – тупаса улонэз яратйсь, лякыт, кылзйськись луэ, со гажан-жалянэн но зеч емышъёсын тырмемын, шонерлыко, оскиськымон луэ. <sup>18</sup>Шонер улонлэсь емышсэ кизё тупаса улонэз ваисъёс.

#### 4-тй ЛЮКЕТ

<sup>1</sup>Кытысь пото тйляд куспады керетыса, вожвыльясъкыса улонъёсты? Мугор люкетъёсты пушкын бугырьяськыса ульйсь жуатскем кулэ каронмылкыдъёслэсь öвöл-а? <sup>2</sup>Мае ке но кулэ кариськоды – нош тйляд соды öвöл. Виыльйськоды, вожьяськиськоды – нош мар кулэ, сое басьтыны уд быгатйське. Ченгешиськоды, тушмоньяськиськоды – нош тйляд соды öвöл, малы ке шуоно, уд куриське. <sup>3</sup>Куриськоды но, уд басьтйське, малы ке шуоно, зеч уж лэсьтон понна сое уд куриське. Куриськоды лулмугордылы майбыр улон понна. <sup>4</sup>Азыса-калгыса ульйсьёс! Уд тодйське шат, таиныз дуннеен эшьяськыса улон Инмарлы пумитьясъкон



луэ шуыса? Озыен, кинлэн таизлы дуннелы эш луэмез потэ, со Инмарлы тушмон луэ. <sup>5</sup>Яке тй малпаськоды Гожтэм юнме гинэ вера: ”Асьме пушкын улйсь дух туж кужмо яратэ”? <sup>6</sup>Нош эшшо бадзымгес дэлет сётэ; соин ик шуэмын но:

”Инмар вылтйяськисьёслы пумитьяське, нош востэмьёслы дэлет сётэ”.\*

<sup>7</sup>Озыен, Инмарлы тэрытске, нош дьяволлы пумит султэ, – соку со тй дорысь бызьыса кошкоз.

<sup>8</sup>Инмарлы матэ кариське, Со но тйляд матады лыктоз. Киостэс сузялэ, сьöлыкоос. Сюлэмьёстэс чылкытатэ, чеберьяськисьёс. <sup>9</sup>Чигиськелэ, бöрдэ, викышьялэ. Серекъянды бöрдонлы мед пöрмоз, шумпотонды – куректонлы. <sup>10</sup>Кузё-Инмар азын тэрытске, – Со тйледыз жутоз.

<sup>11</sup>Агай-выньёсы, огдэс огды урод кылын эн куаретэ. Кин агай-выныз сярысь урод кыл вера ке, яке агай-вынзэ судить каре ке, со Инмар законэз урод кылын веран, законэз судить карон луэ. Нош тон законэз судить кариськод ке, соку тон законэз быдэсьясь уд ни луиськы, судья луиськод. <sup>12</sup>Закон Сётйсь но Суд Лэсьтйсь – одйг, Со утыны но, быдтыны но быгатэ. Нош тон кин сыче – мукетсэ судить кариськод?

<sup>13</sup>Табере тй кылзэлэ, тазы верасьёс: ”Туннэ яке чюказе сыче-сыче городэ мыномы но отын одйг ар уломы, вузкаромы, барыш басьтомы”. <sup>14</sup>Нош асьтэос тй уд тодйське мар луоз чюказе: уго мар

\* 4:6 Притч. 3:34.

со тйляд улонды? – Бус, кудйз вакчи дырлы возь-  
матскиз, нош собере сылмиз-быриз. <sup>15</sup>Тазы шуэм  
интые: ”Кузё-Инмарлы кулэ ке луиз, улэп ке луи-  
мы, сое яке тае лэсьтомы”, <sup>16</sup>нош тй, вылтйяськон  
сямдыя, ушъяськиськоды: котькудйз сыће ушъясь-  
кон – со ярантэм, урод уж. <sup>17</sup>Озыен, кин зеч лэсь-  
тон сярысь тодэ, но сое уг ке лэсьты, солы сьöлык  
луэ.

### 5-тй ЛЮКЕТ

<sup>1</sup>Табере тй, узырьёс, кылзйське: бöрдэлэ, ви-  
кышъялэ тй вылэ куректон-кайгуос лыкто шуыса.  
<sup>2</sup>Тйляд узырлыкты сисьмиз, нош дйськутъёстэс  
кей сииз. <sup>3</sup>Тйляд зарниды но, азвесьты но сыно-  
мизы. Соослэн сыномемзы тйледлы пумит тоды-  
тйсь луозы но тыл выллем тйлесьтыд мугордэс  
сиёзы: берпуметй нунальёслы тй асьтэлы ваньбур  
люкады. <sup>4</sup>Тани, бусыдэс аранын ужамьёслэсь  
дунзэс тырытэк кельтэмды тйледлы пумит шара  
вера, арасьёслэн куараен бöрдэмзы Саваоф Кузё-  
Инмар доры кылйськизы. <sup>5</sup>Тй майбыр улйды  
дунне вылын, эзыласа улйды; вандыны дасям пудо  
кадь сюлэмьёстэс кöй кариды. <sup>6</sup>Шонер улйсез тй  
судить кариды, вииды, – со тйледлы öз пумить-  
яськы.

<sup>7</sup>Озыен, агай-выньёс, Кузё-Инмар лыктытозь  
юн чидаса улэ. Тани музьем ужась ас музьемез-  
лэсь дуно емышсэ возьма. Вазез зор, берез зор  
вуытозь, кема чидаса вите. <sup>8</sup>Тй но туж чидаса

улэ. Сюлэмьёстэс юнматэ, – Кузё-Инмарлэн лык-тонэз матэ вуэ. <sup>9</sup>Агай-выньёсы, судэ медад сюре шуыса, огды вылэ огды эн урттылйське: тани, өс выжыын Судить Карись сылэ. <sup>10</sup>Агай-выньёсы, пророкьёслэсь курадзоньёссэс, кема чиданьёссэс адзем каре. Соос Кузё-Инмарлэн нимыз вылэ пыкиськыса вераськизы. <sup>11</sup>Тани, киньёс трос чидазы, соосты ми шудоесь шуыса лыдьяськомы. Тй кылды Иовлэн чиданэз сярысь. Кузё-Инмарлэсь солы сётэм зечлыксэ но адзиды. Уго Кузё-Инмар зеч сюлэмо, ваньзэ гажась-жалясь.

<sup>12</sup>Нош нырысь ик, агай-выньёсы, суд улэ медад сюре шуыса, инмен но, музыемен но, – номырин но кыл эн сётэ. Тйляд кылды мед луоз ”озыы, озыы”, яке ”өвөл, өвөл”.

<sup>13</sup>Кин тй пöлын лек курадзе? – Мед вöсяськоз. Кинлы шулдыр? – Псаломьёс мед чирдоз. <sup>14</sup>Тй пöлысь кин висе? – Вöсяськисьёслэсь кивалтйсьёссэс мед öтёз но со висись мурт понна мед вöсяськозы. Кузё-Инмарлэн нимыныз сое вöйын мед зырзозы, – <sup>15</sup>оскыса вöсяськон висисез бурмытоз но Кузё-Инмар сое султытоз. Сьöлыкьёс ке со лэсьтэм, соос куштйськозы. <sup>16</sup>Мед бурмоды шуыса, ог-огды азын сьöлыкьёстэс вералэ но огды понна огды вöсяськелэ. Шонер улйсьлэн сюлмысь вöсяськемез трос лэсьтыны быгатэ. <sup>17</sup>Илия асьмеос кадь ик адями вал, зор медаз луы шуыса вöсяськыса куриськиз но, музыем вылэ куинь ар но куать толэзь зор öз усыы. <sup>18</sup>Собере нош ик вöсяськиз: инбам зор сөтйз но музыем емышсэ будэтйз.

<sup>19</sup>Агай-выньёсы! Тй пöлысь кин ке но зэмлыклэсь палэнскиз ке, нош кин ке сое берен зэмлык пала берыктйз ке, <sup>20</sup>тодэ: сьöлыко муртэз öрекчаськон сюрес вылысь берыктйсь мурт лулзэ кулонлэсь уте, солэн трос сьöлыкъёсыз куштйсько шуыса.